

tute 39 galie cesaree, et una fusta zonseno in questo canal de Viscardo et zonseno a San Nicolò de Civita, le nave andono de fuora via de l'ixola, sopra le qual è restati da fanti zerca 4000 molto malcontenti, perchè il capitano Doria et il conte de Sarno capitano di le fantarie tornano richi di prede fate, come si dice da 80 in 100 milia ducati; non crede siano tanti, ma ben assà numero. Et li fanti veneno sopra l'armata senza haver le page et se imbarcorono con speranza de vadagno, ma vedendo non l'haver hauto, tien, volendo più armar dite fantarie, non vorano tornar: *unde* hesendo io con l'armada a Corfù, et intendendo el venir de la Cesarea, per non mi trovar con quella come feci con la turchesca, me partii et son venuto qui al Butintrò con galie 33, non però partiti per paura, perchè quando si fossemo trovati le nostre galie hariano monstrato bon conto, et levai da Corfù zerca 350 fanti. Ha inteso 15 galie dil principe Doria et le 3 dil nepote è ben in ordine, ma molte di le altre mal in ordine, *praecepue* le 9 dil Papa armate a Zenoa de bona voia. A li 16 dita armata cesarea vene a Corfù, ma sorse al Cardachio et da 10 in 12 galie veneno al muolo de Corfù per soi bisogni, poi la sera si levò et andò al scioio dil Malipiero proximo a la terra da l'altra banda, et poi la notte dito capitano Doria se levò con tute le galie et non sorseno a Casoppo et heri fono vedute tra el Fano et le Merlere. Io mandai Hironimo da Canal mio segretario a visitation dil prefato capitano, alegrando me de soi felici successi et comunicarli nove de 23 dil passato, haute di progressi de la Cesarea Maestà et dil suo venir in Italia; il che li fo molto agrato. El disse non volea passar questa invernata in Spagna, si per esser mal disposto di la persona per certo cataro che molto l'ofendea, come perchè non li pareva de inverno far tal pasazo. Il qual segretario li parlò de formenti tolti a li altri navili in colfo di Patras. Li rispose eran stà tolti da li navili moreschi presi da la soa armata, et li patroni meritavano castigo. Ditto segretario li dimandò stara 2700 tolti da uno navilio nostro cargo per Venetia, oferendoli darli li danari dil costo. Rispose haver bisogno de formenti, et se mandasse in Puia o in Sicilia faria dar trata de formenti, se ben la dovesse tuor in suo nome, dicendo li è la fonte de le biave. Poi disse esserli stà fate molte querele de nostri subditi, ma lui è bon servitor de la Signoria etc. Et tolto licentia soa signoria me mandò uno suo zentilhomo, qual

parlando con mi me disse, come dita armata parte andava a disarmar, *videlicet* 4 galie de la religion de Rodi et la nave grossa, vano a Malta, 6 in Cicilia, 2 a Napoli, 3 dil Papa a Civitavechia, le 9 dil Papa armate a Zenoa andariano a Zenoa, et il principe Doria con le sue 15 a Taranto over Brandizo; poi de li soa signoria andaria a Napoli per terra, poi a Roma, mandando le galie predite a Zenoa. Et che a Roma vol rifiermar Antoniotto Doria per capitano di le 3 galie dil Papa, et far uno altro suo nepote cardinal. Le nave, il forzo, sono andate a Messina, 4 *solum* over 5 dieno andar a Brandizo, et ragusei hanno mandato uno bregantino al dito capitano pregando licentia le nave ragusee de dita armata, sichè vedendo io questo disarmar heri et hozi ho ateso a far le zerche a queste galie greche et le manderò a disarmar. Et manda prima de qui a disarmar sier Zuan Justinian a la qual galia ha dato una paga, et ordinato lievi da Corfù domino Guido de Naldo con la sua compagnia, a la qual voleva dar $\frac{1}{2}$ scudo per uno, ma el suo capitano me ha acertà la povertà soa, benchè habbino compito le page che tocorono, li ho fato dar uno scudo per uno et pagà li navili. Scrive el capitano Doria me mandò a dimandar do pezi de antena et alcuni remi che li bisognava, *unde* scrissi a Corfù et l'ho servito. Replica licentia dil suo disarmar.

Di Corfù, di sier Nicolò da Ponte dotor, bailo et capitano, sier Zuan Moro proveditor zeneral et consieri, di 14 Novembrio, ricevute a di 12 Decembrio. Scriveno dil zonzer de li de galie do, soracomiti sier Zacaria Barbaro et sier Andrea Duodo, portano nova el capitano Doria con l'armata esser levato de l'impresa et esser in canal de Viscardo et venir a questa volta. Il qual venuto, lo saluteremo con l'artelarie et lo apresentaremo de refrescamenti. Questa matina el clarissimo zeneral era de qui con la nostra armata et tolse con sè tre compagnie de fanti, zoè Toso Furlan, Giacomo da Nocera et Zuan Agnolo da Milan, el qual zeneral è per levarse questa note. Scrive è pochi formenti su l'ixola et in questa città, et per causa de quelli dil Zante tieneno non ne potranno haver da lochi turcheschi, etc.

Dil dito rezimento, di 16 et 17, ricevute a di sopradito. Come hanno hauto lettere dil zeneral che se dagi al capitano Doria 30 remi pianati et do pezi de antena et cussi ge l'habiamo date, et do peoti pratici. Scriveno de li non esser più alcuna antena.